

**Ajunaarnersuarnik ajunaarnersuartulluunniit ittunik pisoqartillugu
iliuuseqapallattarnermut upalunaarsimanagerup kommuninit akisussaaffigineqarnerata
pitsaaqutaanik pitsaanngequtaanillu UKA2018-imut Naalackersuisut
nassuiaasiornissamik peqquneqarnissaannut Inatsisartuni aalajangiiffigisassatut
siunnersuut**

(Saqq.: Inatsisartunut ilaasortaq Bendt B. Kristiansen, Inuit Ataqatigiit)

pillugu

Sanaartornermut ataatsimiititaliap

ISUMALIUTISSIISSUTAA

Siunnersuutip aappassaaneerpeqarneranut tunniunneqartoq

Suliarineqarnerani ataatsimiititaliaq ukuninnga inuttaqarpoq:

Inatsisartunut ilaasortaq Bendt B. Kristiansen, Inuit Ataqatigiit, siulittaasoq

Inatsisartunut ilaasortaq Jens-Erik Kirkegaard, Siumut, siulittaasup tullia

Inatsisartunut ilaasortaq Pitsi Høegh, Siumut

Inatsisartunut ilaasortaq Jess Svane, Siumut

Inatsisartunut ilaasortaq Villy Olsvig, Inuit Ataqatigiit

UKA 2017-ip nalaani ull. 18. oktober siullermeerereernermi siunnersuut ataatsimiititaliamit misissorneqarpoq.

1. Siunnersuutip imaa siunertaalu

Ajunaarnersuaqarnerani kommunit akisussaaffeqarneranni pitsaaqutaasut pitsaaqutaanngitsullu pillugit Inatsisartunut nassuiaateqarnissamut Naalackersuisut peqquneqarnissaat Inatsisartut aalajangiiffigisassaattut siunnersuummi siunertaavoq, tamatumalu kingorna upalungaarsimaneq pillugu kommunit siunissami akisussaasuunerisa naleqquttuusorinera nalilerneqarsinnaassalluni.

2. Siunnersuutip Inatsisartuni siullermeerneqarnera

Siunnersuutip siullermeerneqarnerani siunnersuutip akuerineqarnissaa isumaqatigineqarpoq.

3. Siunnersuutip ataatsimiititaliamit suliarineqarnera

Ataatsimiititaliap paasinikuuaa, kalaallisuuani oqaatsimik amigaateqartoqarnera, oqaatsitillu eqqortuunerunissaat tunngavigalugu, allannguutissatut siunnersuut saqqummiunneqarpoq:

“Ajunaarnersuarnik ajunaarnersuartulluunniit ittunik pisoqartillugu kommunit upalungaarsimanermik nalinginnaasumik immikkullu ittumik isumaginninneranni pitsaaqutaasut pitsaanngequtaasullu pillugit UKA 2018-imut misissueqqissaarnermik Naalakkersuisut suliaqaqquneqarnissaannut Inatsisartut aalajangiiffigisassaattut siunnersuut. Misissueqqissaarnermi upalungaarsimanermi atortuutit atoriaannaat naammannersut aamma nalilerneqassaaq.”

Siunnersuut kiisalu Naalakkersuisut Siulittaasuata upalungaarsimanermut suliaasaqarfik pillugu allagaa 27. Sept. 2017-imeersoq ataatsimiititaliap misissorpai. Akissut isumaliutissiisummut uunga tapiliunneqarpoq (Ilanngussaq 1).

Ataatsimiititaliap akissummut nassiunneqartumut atatillugu maluginiarpaa, taanna siusinnerusukkut ataatsimiititaliamit 2014-imili apeqqutigineqarsimasunut akissutaasoq.

Ataatsimiititaliap paasivaa, akissummi nassiunneqartumi 2014-imi aamma 2017-imi atortuutit pillugit marlunnik takussutissiartaqartoq. Ataatsimiititaliap akissutit atortuutillu pillugit takussutissiat misissorpai.

Ataatsimiititaliap aarleqqutigaa atortuutit ilaatigut aserfallatsaalineqarsimasutut atorineqarsinnaasutullu misinnannginnerat, tamannami innuttaasut ilaatigut toqqissisimannannginnerannik kinguneqarsinnaammat.

Ataatsimiititaliap uparuartuinissaq akisussaaffimmillu inissiinissaq siunertarinngilaa, taamaattumillu pineqartup Namminersorlutik Oqartussanit aamma Namminersornerullutik Oqartussanit suliaasaalerneru sioqqulluguli pisunik siunnersuuteqartup nassuiaammik kisitsisitalimmik uppernarsaatitalimmillu piumasaqarnera ataatsimiititaliamit iluarinartinneqarpoq.

Ataatsimiititaliap pingaarnertut siunertaraa, siunissami upalungaarsimaneq pillugu aalajangiinissamat naammaginartumik tunngavissaqarnissaata isumannaarneqarnissaa, tamatumuunakkummi innuttaasut sillimaniarnermut pissutissaqartumik pisariaqartitsinerat iluaqutissinneqassammat, kiisalu akissaajaatit tamatumunnga naammaginartuusuunissaat tunngavigalugu.

4. Siunnersuutip aningaasatigut kingunissai

Inatsisartut suleriaasianni § 33, imm. 1-imi allassimavoq, aalajangiiffigisassatut siunnersuutip piviusunngornerani aningaasatigut allaffissornikkullu kingunissai siunnersuutip tunngavilersuutitaani allaaserineqarsimassasut.

Ataatsimiititaliap maluginiarpaa tamanna naapertorlugu siunnersuutip piviusunngornerani aningaasaqarnikkut kingunissai allaaserineqarsimasut, taamaalillunilu nassuiaatip suliarinissaa ukiumi ataatsimi suliamik ingerlatsinermik pisariaqartitsisoqassasoq. Taamaattorli nassuiaatip nutserneranut naqinneqarneranullu nalunaarutip inaarsarnerani saqqummiunneqarneranilu allaffissornikkut aningaasartuutit aamma isiginiartariaqarput. Naalackersuisoqarfimmi attuumassutilimmi aningaasatigut sinaakkutissatut aningaasaliissutaareersunit aningaasartuutit tamakku akilerneqarsinnaassapput.

Naalackersuisut akissuteqaataata ilimanarsisippaa pisariaqartumik aserfallatsaaliuineranut, atortuutinik nutaanik pisinermut aammalu upalungaarsimasut sungiusartinneqartarnerannut takussutissiortoqarnissaa. Ataatsimiititaliap naatsorsuutigaa, siunnersuutip aningaasatigut kingunissai attuumassutilit Naalackersuisoqarfimmut attuumassutilimmut kommuninullu aningaasatigut sinaakkusiussaareersunit akilerneqarsinnaanissaat.

5. Ataatsimiititaliap inassutai

Ataatsimiititaliap isumaqatigiittup ataatsimiititaliamit allannguutissatut siunnersuutigineqartup akuerineqarnissaa inassutigaa.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Bendt B. Kristiansen,
Siulittaasoq

Jens-Erik Kirkegaard,
Siulittaasup tullia

Pitsi Høegh

Jess Svane

Villy Olsvig